

პრობლემა ჯერ კიდევ ბევრია

თბილისი. “ლოკომოტივის” სტადიონი. 16 მაისი.

“დინამო” (თბილისი) – “ტორპედო” (მოსკოვი) 2:0 (2:0).

“დინამო”: გოგია, ძოძუაშვილი, ჭელიძე, ებრალიძე (მუჯირი), ხინჩაგაშვილი, გავაშელი (გ. მაჩაიძე), მ. მაჩაიძე, ქორიძე, დარასელია, ყიფიანი, ესებუა.

“ტორპედო”: ელიზაროვი, ტუკმანოვი, პახომოვი, ბუტურლაკინი, ბელოუსოვი, მაქსიმენკოვი, ფილატოვი, ნიკონოვი (პოლივიხინი), იურიანი, ესკოვი (გრიშინი), დეგტიაროვი.

მსაჯი: ე. აზიმზადე (ბაქო).

დუბლიორთა მატჩი ავდრის გამო გადაიდო.

სატურნირო მდგომარეობა, რომელიც 16 მაისისთვის იყო შექმნილი ჩემპიონატის ცხრილში, თბილისის “დინამოსგან” მხოლოდ გამარჯვებას მოითხოვდა, ვინაიდან კიდევ ერთი მარცხი ფაქტურად ნიშნავდა შარშანდელი ისტორიის გამეორებას, როცა დინამოელები თითქმის მთელი სეზონის მანძილზე სტაბილურად იყვნენ აუტსაიდერთა შორის.

ეს გამარჯვება ჩვენმა გუნდმა მოიპოვა. 2 ქულა, თავისთავად, ძალიან სასიხარულოა, თანაც, რაიმე ეჭვი ამ მოგების გამო არ შეიძლება არსებობდეს. თბილისელებმა მატჩის დიდი ნაწილი საგრძნობი ტერიტორიული უპირატესობით, აქტიურად, მონდომებით ჩაატარეს და წინა შეხვედრებთან შედარებით უკეთ თამაშობდნენ.

მაგრამ მარტოოდენ ის ამბავი, რომ გუნდი წინა შეხვედრებთან შედარებით უკეთ თამაშობდა, არ შველის საქმეს. უაღრესად საჭირო 2 ქულის აღება სრულიადაც არ ხსნის დღის წესრიგიდან დინამოელთა თამაშში არსებულ ნაკლოვანებებს, იმ რთულ პრობლემებს, რომლებიც არც ისე იოლი გამოსასწორებელია.

ამ მატჩიდან ის შთაბეჭდილება დაგვრჩა, რომ მოსკოვის “ტორპედო” შორს იდგა იმ დონისგან, რომელზეც ჩვენ ხშირად გვინახავს ეს კოლექტივი. ძნელი სათქმელია, მარტო ამ მატჩში თამაშობდნენ ტორპედოელები ასე პასიურად, უინიციატივოდ, შეუთანხმებლად, თუ გუნდი საერთოდ ვერ დგას თავის სიმაღლეზე. მათი სატურნირო მდგომარეობით რომ ვიმსჯელოთ, ის დასკვნა უნდა გამოვიტანოთ, რომ არც ამ გუნდის საქმეებია მინცდამინც ბრწყინვალედ. “ტორპედოს”, რომელიც მუდამ გამოირჩეოდა მაღალი კლასის ოსტატებით, ლიდერებით, ახლა ამჟამად ეტყობა მონინავე მოთამაშის, ორგანიზატორის უყოლობა. არც დაცვაში, არც შუა მინდორზე, არც შეტევაში მას არა ჰყავს წარმმართველი ძალა, რომელსაც შეუძლია გადაჭრას დიდი ამოცანები. იურიანის ცდა, საკუთარ თავზე აეღო ეს ფუნქციები, უნაყოფოდ დამთავრდა, სხვები კი შეზღუდული იყვნენ ლოკალური ამოცანებით. მოსკოველებმა ხეირიანად მხოლოდ მეორე ტაიმის დასაწყისში, დაახლოებით 10–15 წუთის მანძილზე ითამაშეს და მაშინაც, როცა გუნდი შეტევაზე იყო, უფროსმა მწვრთნელმა, ჩემი აზრით, უსაფუძვლოდ შეცვალა ნიკონოვი და ესკოვი, რომელთა შემცვლელებმა ნაკლები სარგებლობა მოუტანეს კოლექტივს.

დინამოელთა რიგებში მომხდარი შეცვლებიდან ერთი იძულებითი იყო (ებრალიძე დაშავდა), მაგრამ გავაშელის მაგივრად მინდორზე გამოსულმა გ. მაჩაიძემ

გაცილებით უფრო ვრცელ ტერიტორიაზე ითამაშა, მეტი დინამიკა შეიტანა საერთო მოძრაობაში და ინდივიდუალურ მოქმედებას პარტნიორებთან ურთიერთმოქმედება არჩია.

როცა ვლადიმერ კობახიძის თბილისელთა ნაკლოვანებებზე, არსებითად უნდა გავიმეოროთ ის, რაც უკვე ითქვა, რაზეც ხშირად მოუთითებენ გუნდს სარეცენზიო თუ მიმოხილვით წერილებში. იძულებული ვართ გავიმეოროთ ეს ჭეშმარიტებანი, ვინაიდან სხვაგვარად, თუ ეს შეცდომები არ გამოხსნორდა, კრიზისს თავს ვერ დავაღწევთ და ისევ თითო-ორი მოგებული მატჩის იმედით უნდა დავრჩეთ.

პირველი, რაც თვალში გვხვდება თბილისის “დინამოს” თამაშში, ისაა, რომ ფეხბურთელები არ იხსნიან, არ სთვამობენ საკუთარ თავს პარტნიორებს და გამოდის, რომ თითოეული მათგანი დამოუკიდებლად, ინდივიდუალურად ცდილობს გაართვას თავი ძნელ ამოცანას ეს ეხება არა მარტო თავდამსხმელებს, არამედ შუა ხაზის მოთამაშეებსაც. თამაშის ასეთი სტილი თანამედროვე ფეხბურთში ყოველად მიუღებელია. მაგალითისთვის, რა თქმა უნდა, მოვიყვან კიევის “დინამოს”, სადაც ბურთიან მოთამაშეს გადაცემის მისაღებად დაუყოვნებლივ ეხსნება არა ერთი, არამედ ორი და ზოგჯერ სამი თანაგუნდელიც და კომბინაციური მოქმედებისთვის სისტემატურად იქმნება რამდენიმე ვარიანტი, რომელთაგან შეიძლება საუკეთესოს ამორჩევა.

თბილისელები ასე არ თამაშობენ. ბურთის ზედმეტი გაჩერება აქ სისტემადაა ქცეული, უბურთო მანევრები, მოულოდნელი სვლები და ტაქტიკური გადაცემები კი სრულიად დავიწყებულია. ამ მხრივ განსაკუთრებით სკოდავენ მ. მაჩაიძე, ძოძუაშვილი, გავაშელი...

ბევრ დროს კარგავენ ჩვენები ბურთის ტარებისას მინდვრის სიგანეზე, გარდიგარდმო. ნაცვლად იმისა, რომ გადაცემა თუ მოძრაობა დაუყოვნებლივ მიმართული იყოს წინ, მეტოქის კარისკენ, თამაშს ჰქონდეს აგრესიული, მწვავე ხასიათი, ყველაფერი სრულდება კარის პარალელურად, უსარგებლოდ და მოწინააღმდეგესაც სწორედ ეს უნდა. იგი ყველაფერს ასწრებს ამასობაში.

დაბალი ტემპით, ნელი თამაში ძალიან უარყოფითად მოქმედებს თბილისელთა საერთო შედეგიანობაზე. კარში დარტყმები სხვადასხვა მანძილიდან, მოულოდნელი გადაადგილებანი ის იარაღია, ურომლისოდაც თვითონ ზედმეტია წარმატებაზე. გუნდი ხშირად ხანგრძლივ იერიშზეა, დიდ დროს ატარებს მოპირდაპირე ნახევარზე, კარში კი არავენ ურტყამს. სწორედ ამიტომაც, რომ დინამოელებმა ჩემპიონატის განვლილი 7 მატჩიდან მხოლოდ ორში შეძლეს გოლების გატანა და ახლა უარყოფითი ბალანსი აქვთ. საკმარისი იყო მე-19 წუთზე ყიფიანს და 34-ე წუთზე ქორიძეს საჭირო გამბედაობა და სიზუსტე გამოეჩინათ და ტორპედოელთა კარში ორი გოლი გავიდა. მანამდე კი ახალგაზრდა დარასელიას მიეცა ბურთის გატანის აშკარა შანსი. შემდეგ მეორე ტაიმში, თავით კარგად ითამაშა ყიფიანმა, როცა მეკარე ელიზაროვმა თავგანწირული ნახტომით ძლივს იხსნა თავისი კარი.

ისეთი კლასისა და გამოცდილების გუნდს, როგორც თბილისის “დინამო”, უნდა ჰქონდეს წინასწარ დამუშავებული, შესწავლილი, ტიპური კომბინაციები ცალკეულ რგოლებს ან მოთამაშეებს შორის, როცა თითოეულმა მათგანმა ზუსტად იყოს, როდის რა გააკეთოს, როგორ “დაიჭიროს” და დასაჯოს მეტოქე მისავე შეცდომაზე გარკვეულ სიტუაციაში. ასეთი დამუშავებული კომბინაციები კი ჩვენს გუნდს არა აქვს.

შეიძლებოდა ლაპარაკი სხვა ხარვეზებზეც, მაგრამ, რახან თბილისის “დინამოს” თამაშს უკეთესობა ეტყობა, იმედი უნდა ვიქონიოთ, რომ პროგრესი არ შენეულდება. ეს დინამოელებმა უნდა დაგვიმტკიცონ მომავალ რთულ მატჩში მოსკოვის არმიელებთან, რომლებმაც ამ ტურში სტუმრად შეძლეს გამარჯვების მოპოვება და, ცხადია, თბილისშიც მთელი ძალით ითამაშებენ.

ა. ჭკუასელი, სპორტი ოსტატი.

“ლელო”, 18 მაისი, 1975 წ.